



Majlis Ugama Islam Singapura

Khutbah Jumaat

9 September 2016 / 7 Zulhijjah 1437H

Sabar Membawa Ke Syurga

الْحَمْدُ لِلَّهِ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ بَشِيرًا وَنَذِيرًا
وَدَاعِيًا إِلَى اللَّهِ بِإِذْنِهِ وَسِرَاجًا مُنِيرًا وَأَشْهَدُ أَنْ لَا إِلَهَ إِلَّا اللَّهُ
وَحْدَهُ لَا شَرِيكَ لَهُ وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولَهُ
وَصَفِيُّ اللَّهِ مِنْ خَلْقِهِ وَحَبِيبُهُ إِمَامُ الْأَنْبِيَاءِ وَسَيِّدُ الْمُرْسَلِينَ اللَّهُمَّ
صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا.
أَمَّا بَعْدُ فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ

Sidang Jumaat yang dirahmati Allah,

Marilah kita bertakwa kepada Allah s.w.t. Laksanakanlah segala perintah-Nya dan hindarilah segala laranganNya. Semoga dengan kesabaran kita dalam melaksanakan yang sedemikian, kita memperolehi balasan syurga dari Allah di hari akhirat kelak. Amin.

Saudara, khutbah minggu lepas telah menyentuh mengenai sifat sabar yang merupakan ciri istimewa yang dikurniakan

Allah kepada hamba-hamba-Nya. Sabar adalah sifat yang sangat dituntut dalam agama kita. Sifat kesabaran Baginda s.a.w dan para Anbiya' yang lain menjadi contoh terbaik kepada kita hari ini dalam menjalani kehidupan yang tidak sunyi dari ujian dan cabaran.

Mengikut pendapat sebahagian Ulama, terdapat empat bentuk kesabaran yang perlu dimiliki oleh manusia di dalam mengharungi kehidupan; (i) kesabaran dalam melaksanakan ketaatan kepada Allah, (ii) kesabaran dalam meninggalkan maksiat, (iii) kesabaran dalam menghadapi musibah, (iv) dan kesabaran dalam menanggung tohmahan dan cacian. Kesabaran yang terakhir ini merupakan cabaran yang paling getir yang dilalui oleh para Nabi dan Rasul secara khusus Nabi kita Saidina Muhammad s.a.w.

Saudara, harus difahami, sabar bukanlah suatu kelebihan yang berbentuk sampingan. Namun, ia adalah keperluan bagi manusia untuk meningkatkan nilai moral dan spiritual yang ada di dalam dirinya. Ia menjadi suatu keperluan sepertimana yang telah dijelaskan di dalam Al-Quran di mana setiap manusia di muka bumi ini akan diuji oleh Allah s.w.t. Firman Allah:

إِنَّا خَلَقْنَا الْإِنْسَانَ مِنْ نُطْفَةٍ أَمْشَاجٍ نَّبْتَلِيهِ فَجَعَلْنَاهُ سَمِيعًا
بَصِيرًا

Maksudnya: “*Sesungguhnya Kami telah aturkan cara mencipta manusia bermulanya dari air mani yang bercampur, serta Kami tetap mengujinya; oleh itu maka Kami jadikan dia berkeadaan mendengar dan melihat.*” [Surah Al-Insan 76:2]

Dari ayat yang baru dibacakan sebentar tadi, fahamilah saudara, bahawa Allah akan menguji manusia melalui suruhan dan larangan. Allah juga telah membekalkan kepada mereka pendengaran dan penglihatan ataupun dalam erti kata lain pancaindera dan potensi mengatasi cabaran agar mereka mengharungi setiap suruhan dan larangan tersebut dengan kesabaran dan bijaksana.

Ujian dan dugaan hidup tak lain tak bukan untuk memberi peluang kepada manusia membuktikan keyakinan mereka kepada Allah s.w.t. serta menetapkan kelayakkan mereka untuk menerima sanjungan dan ganjaran daripada Allah. Firman Allah s.w.t. di dalam surah Al-Ankabut ayat 2 dan 3:

أَحْسِبَ النَّاسَ أَنْ يَتْرَكُوا أَنْ يَقُولُوا آمَنَّا وَهُمْ لَا يُفْتَنُونَ ﴿٢﴾
وَلَقَدْ فَتَنَّا الَّذِينَ مِنْ قَبْلِهِمْ فَلَيَعْلَمَنَّ اللَّهُ الَّذِينَ صَدَقُوا وَلَيَعْلَمَنَّ
الْكَاذِبِينَ ﴿٣﴾

Maksudnya: “*Patutkah manusia menyangka bahawa mereka akan dibiarkan dengan hanya berkata: "Kami beriman", sedang mereka tidak diuji? Dan demi sesungguhnya! Kami telah menguji orang-orang yang terdahulu daripada mereka, maka*

nyata apa yang diketahui Allah tentang orang-orang yang sebenar-benarnya beriman, dan nyata pula apa yang diketahuiNya tentang orang-orang yang berdusta.”

Sidang Jumaat yang dirahmati Allah,

Sempena menjelang Hari Raya Eid Al-Adha, mari kita sama-sama mengimbas kembali contoh tauladan kesabaran yang telah ditunjukkan oleh Nabi Ibrahim a.s dalam melaksanakan perintah Allah s.w.t. Beliau tidak teragak-agak dalam memenuhi perintah Allah demi membuktikan ketaatannya kepada-Nya.

Firman Allah:

❁ وَإِذِ ابْتَلَىٰ إِبْرَاهِيمَ رَبُّهُ بِكَلِمَاتٍ فَأَتَمَّهُنَّ قَالَ إِنِّي جَاعِلُكَ لِلنَّاسِ إِمَامًا
قَالَ وَمِنْ ذُرِّيَّتِي قَالَ لَا يَنَالُ عَهْدِي الظَّالِمِينَ ﴿١٢٤﴾

Maksudnya: *“Dan (ingatlah), ketika Ibrahim diuji Tuhannya dengan beberapa kalimat (perintah dan larangan), lalu Ibrahim menunaikannya. Allah berfirman: “Sesungguhnya Aku akan menjadikanmu imam bagi seluruh manusia”. Ibrahim berkata: “(Dan saya mohon juga) dari keturunanku”. Allah berfirman: “Janji Ku (ini) tidak mengenai orang-orang yang zalim”. [Surah Al-Baqarah 2:124]*

Saudara, melalui ayat yang baru dibacakan sebentar tadi, seandainya kita menelusuri beberapa kitab tafsir yang muktabar seperti Tafsir Al-Quran Al-Azim oleh Imam Ibn Katsir, para Mufasir akan memperincikan beberapa ujian getir yang

dilalui oleh Nabi Ibrahim a.s. Ini termasuk membangun dan membersihkan Ka'abah, menghadapi Raja Namrud dan berdialog dengannya mengenai tauhid kepada Allah serta ketabahan ketika beliau dicampak ke dalam api sebagai hukuman, mengorbankan anaknya Ismail a.s dan sebagainya.

Semua ujian di atas dilalui oleh Nabi Ibrahim a.s dengan tabah dan sabar, begitu juga setiap titah perintah Allah, dilaksanakan oleh beliau dengan sebaik mungkin.

Saudaraku, marilah sama-sama kita merenung diri secara insaf. Kita belum lagi diuji Allah sebesar ujian yang dilalui oleh para Anbiya' dan Auliya'. Bahkan ujian-ujian tersebut tidak mampu untuk kita memikulnya. Akan tetapi, kita mampu meneladani sifat kesabaran para Nabi dan Rasul, dan kita mampu mendidik diri kita untuk bersabar di saat kita melaksanakan ketaatan atau di saat kita dilanda musibah. Kesabaran tersebut sangat tinggi nilainya di sisi Allah. Kesabaran tersebut perlu konsisten di dalam diri kita. Dan kesabaran tersebut yang meletakkan kita di dalam golongan hamba-hamba Allah yang jujur dan bakal memperoleh syurga Ilahi yang kekal abadi. Sesuai dengan firman Allah s.w.t.:

إِنَّمَا يُوفِي الصَّابِرُونَ أَجْرَهُمْ بِغَيْرِ حِسَابٍ ﴿١٠﴾

Maksudnya: *“Sesungguhnya orang-orang yang bersabarlah sahaja yang akan disempurnakan pahala mereka dengan tidak terkira”*

Tatkala kita berdepan dengan ujian ingatkan diri kita selalu saudara, bahawa itulah jalan yang ditempuhi insan-insan yang dikasihi Allah. Ingatlah bahawa Allah tidak akan menguji seseorang kecuali Dia pasti bahawa kita mampu mengatasinya. Mudah-mudahan dengan kita membangun pemikiran demikian, jiwa kita akan menjadi lebih cekal. Sikap positif akan membantu kita untuk lebih tenang mencari huraian kepada cabaran dan ujian kehidupan kita.

Sidang Jumaat yang dirahmati Allah,

Alhamdulillah, kita sekarang berada pada salah satu 10 hari bulan Zulhijjah yang dimuliakan. Antara amalan istimewa yang boleh kita lakukan pada waktu ini adalah berpuasa secara khusus pada hari kesembilan Zulhijjah yang jatuh pada hari Ahad ini. Para Ulama dan Fuqaha bersepakat menyatakan bahawa puasa pada hari tersebut merupakan amalan puasa yang terbaik sepanjang 10 hari di bulan Zulhijjah. Ini berdasarkan sabda Rasulullah s.a.w:

صِيَامُ يَوْمِ عَرَفَةَ أَحْتَسِبُ عَلَى اللَّهِ أَنْ يُكَفِّرَ السَّنَةَ الَّتِي قَبْلَهُ وَالسَّنَةَ الَّتِي بَعْدَهُ

Maksudnya: *“Puasa hari Arafah dihitung di sisi Allah sebagai menghapus dosa tahun sebelumnya dan tahun sesudahnya.”*

[Hadith riwayat Imam Muslim]

Semoga Allah mengurniakan kita Taufiq untuk mengerjakan amalan soleh pada hari-hari mulia ini. Dan tidak lupa juga untuk kita panjatkan doa ke hadrat Ilahi agar Dia mempermudah segala urusan saudara mara, sahabat handai kita dan seluruh umat Islam yang sedang melaksanakan ibadah haji di tanah suci, semoga mereka dikurniakan haji yang mabrur dan semoga kita dikurniakan kesempatan seperti mereka menjadi tetamu Allah di masa akan datang. Amin Ya Rabbal Alamin.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.